

መጅልስ አምን ወለዛልም ቀራራቱ ድድ ኤሪትሮፖ
(19ይ ክፈል)



እብ ዶ/ር አሕመድ ሐሰን ድሕሊ

ተርጀመት: መሐመድ እድሪስ መሐመድ

2. ምድር ፑንት (ፑንት ላንድ)

ዲብ መንጠቀት ቅብለት ምፍጋር ጸሓይ ሶማል: እብ ኮሎኔል ዐብደላ ዩሱፍ ለትትመረሕ ቅያደት ስያስዩት: ዲብ ዮም 5 ማዮ 1998: ዲብ መዲነት ገርወ እጅትመዕ እንዴ ወዴት ዲብ ፑንት ላንድ ሕኩመት አወጀት። እብ ታሪካይ እንክር ልትረኤ ዲብ ህለ ቀደም ሕርዩት: ምስል ግብለታይ እንክር: ሐን እስትዕማር ኢጣልዩ ለዐለት መንጠቀት ተ። እብ ቃብል እሊ እለ መንጠቀት እለ ክምስል ምድር ሶማል መትፈንታይ ለጠልብ ኢኮን። ጠለበ: ዲብ ከርስ ሐቴ ሶማል ዲብ ለህሌ ድፈራልያይ ንዛም: ናይ ከርስ እዳረት እግል ተህሌ እላቱ። ምናተ ምን ወቅት ዲብ ወቅት ሕርዩት ክምስል ተአውጅቱ ለተአትፋርህ። ክሎኔል ዐብደላ ዩሱፍ ዲብ ሰነት 1978 ምስል ብዝሓም ሶማልዩን ዐሳክር: ድድ ጀነራል ስያድ ባሬ ፋሽል ጀርቤ እንቅላብ ክምስል ወደ ልዘከር። ግራሁ አስክ አቶብዩ እንዴ ሀርብ: እብ ሰዳይት ኮሎኔል መንግስቱ ሀይለማርያም “ዲሞቅራጥያይት ጀብህት እግል መንገፎ ሶማል” ለትሰመ ተንዚም አሰሰ። ናይ አቶብዩ ሕኩመት መለስ ዜናዊ: ምድር ፑንት እዳረት ከርስ ምን አወጀት እብ ፈርሐት ትከብዩ። ለሰበብ ህዩ ለምስዳር እግል ብንዩት ውሕደተ ለትተረደት ወድቅብት ሶማል ለለዐንቅፍ ወዲብ ሶማል ናይሽ ሐዋን ሕር ሀውያት ለከልቅ ሰበት ገብአ ቱ።

ሰብ ሰልጠት አቶብዩ ዲብ ሽኡን ከርስ ምድር ፑንት እንዴ አተው፡ እግል ሐቴ ጀህት እብ ዐውለ ብዕድ ክምሰል ሰዱ እድንያይ ተቅሪር ለሐብር። እግል መሰል ኮሎኔል ዐብደለ ዩስፍ ዕምር ሰልጠቱ ክምሰል አክተመ፡ እግል ለአተላሌ ሰበት ተሐዘ አከይ መቅርሕ ሐቆለ ትወለዐ፡ አቶብዩ ዲብ ሰነት 2001 እግል ሐሽም ኮሎኔል ዐብደለ ዩስፍ ድድ ሐሽም ጃምዕ ዐሊ ጃምዕ ሰዴት። እለ ሶማልያት መንጠቀት እለ ድቁብ ናይ ስያሰት መሻክል ወቄትላይ ናይ ቀባይል ጅግራታት ለዐመያ ቱ። ዲብ ምድር ፑንት ሰለስ ሐሽምት ዳርድ ነብሮ። ህቶም ህዬ ማጀርቲ ወርሰንገለ ወደልሃንጉቱ ቶም። እበ ጀህት ሐቴ ፍንጌ ሰለስ ቀባይል ማጀርቲ በህለት ዑስማን መሕሙድ፡ ዒሰ መሕሙድ ወዑመር መሕሙድ፡ ፍንጌ ማጀርቲ ወብዕድ እብ ዓመት፡ ፍንጌ ገሌ ጀሃት ወርሰንገለ ወደልሃንጉ ህዬ እበ ብዕድ፡ ደግሽ ትወለዐ። ክምሰል ልትአመር መስኩብት ናይለ መንጠቀት እግል አድመኖት እብ ክሎም ጀሃት ዲብ ዕቅብት ሜዛን ናይ ሕበር መባጥር ወፈሀም ዐለ እቱ። ምድር ፑንት ዲብ ብዕዳም ጀሃት እንክር ግብለት ሶማል ሰለጠት ዲብ ይዐለ እቱ፡ ምን ተአሰስ እቱ ወክድ እንዴ አስተብደ፡ ክምሰል አቅሊም ሕክም ከርስ ዐለ እቱ። ሕኩመት ዳክልየት ዐለት እሉ። ሕኩመት ዳክልየት ምድር ፑንት እብ ሕውናህ ወፋሰደት እዳረተ፡ እብ ሐገሌብ ሽቅል ወመትመዳድ ናይለ ትፈናተ ኢቃኑናይ ትጃራት ለተአመረት ተ። እብ ተውሳክ ዲብለ ዲብ ምሒጥ ህንድ ለልትመደድ ወዲብ ክሉ ከፈፍል ሰዋሕል ሶማል ለጠወረት ዛህረት ቀርሰነት በሐር፡ መራክብ ወጅላብ ለረሴ እቱ ሚናት ወማርሳታት፡ መቀርሰነት፡ ምን ልትረኤ እቱ ለዐለ ግብለታይ ክፋል ለሐሰት መስኩብት ለዐለ እቱ ምድር ፑንቲ ቱ። ቅብለታይ እንክርመ መስኩብት ምድት እተ ለዐለት መንጠቀት ተ። እምበል እሊመ ፍንጌ ምድር ፑንት ወምድር ሶማል እብ ሰበት ምልክየት አሳንጀ ፍንጌ ምድር ፑንት ወሃውዩ ህዬ እብ ሰበት ምልክየት መዱቅ ናይ ሕዱድ መሻክል ህለ።

3. ምድር-ጁብ (ጁብ ላንድ)

እለ መንጠቀት እለ ዲብ ጠረፍ እንክር ግብለት ሶማል ለህሌት እት ገብእ፡ እብ ቅብለት ምፍጋር ጸሓይ ምስል ኬንዩ ትትሓደድ። ሚነት ኪስማዮ ህዬ ዓሲመት ናይለ መንጠቀት ተ። ክምሰል ክለን ብዕዳት መናጥቅ ሶማል ህዬ እብ መሻክል - ዳርድ ወሃውዩ እበ ምሮ እንክር፡ እበ ካልእ ህዬ ፍንጌ ቀባይል ዳርድ እግል ኖሰን ለልትዐዘብ ቱ። እበ ህለ እሉ ጂኦስትራትጂያይ አሀምየት እቅትሳድ ህዬ፡ አቶብዩ ወኬንዩ እግል አከይ-መቅርሕ ዲብ አሳዋር ኢፋሉታይ ዶር ተለሀዩ። ዲብ ዮም 3 ዲሰምበር 1998 ጀነራል መሐመድ ስዒድ ሐርሲ (ሞርጋን)፡ ምድር ጁብ ናይ ከርስ ሕርየት ክምቡ አወጀ። ምናተ ለሕርየት ምን 10 ወሬሕ ለተሐልፍ ይዐለት።

4. መንጠቀት ገለመዱቅ

ናይ እለ መንጠቀት እለ ስሜት፡ ምን ዲብ ግብለት ምድር ፑንት ወቅብለት መቃዲሾ ለህሊዩ መናጥቅ ገልጎድቅ ወመዱቅ ለትረከባ ቱ። መንጠቀት ገልመዱቅ ክምሰል ፈደራልያይት መንጠቀት ዲብ ዮም 14 ኦገስት 2006 ቱ ለአምበተት። ክምሰልሁመ ዲብለ ዲብ ሰነት 2004 ዲብ ኬንዩ ለዳለ፡ አክል ሕድ ወስል (ኮፒ) ናይ “ፈደራልየት ዲሞቅራጥየት ጀምሁርየት አቶብዩ” ላተ መትዐድያይ ፍደራልያይ ሚሳቅ ሕብር ክምሰለ ህለ፡ መሐመድ ወርስመ ዐሊ ርኢስ ናይለ መንጠቀት ገብአ፡ ለእግል እለ መንጠቀት እለ ዲብ ከወኖት ምህም ዶር ለተልሂት አቶብዩ ህዬ፡ ዲብ ሰነት 2007 ሚሊሻታት ናይለ መንጠቀት ሕዱዶም ምን መትኣታይ ወብዕድ ቀባይል ሶማል እግል ልራቅቦ ዐስከርያይት ሰዳይት ሀብቶም።

መንጠቀት ማከር

እለ መንጠቀት እለ ምድርሶማል ወምድር ፑንት ለልትበአሰ እተ፡ ዲብ ምውዳቅ ጸሓይ ሳንጅ፡ ምፍጋር ጸሓይ ባሪ ለህሌት እት ገብእ፡ ዓሲመተ በድሃን ተ። ፍንጌ ውሕዳት ምድር ሶማል ወምድር ፑንት ትሉሉይ መዓርክ ለትረከ እታ ቱ። ሜርሓይ ናይ እለ መንጠቀት እለ ርኢስ ጀብርዮ ዐሊ ሰላድ፡ ዲብ ዮም ሐቴ ጁላይ 2007 ዲብ ድዋር ፈደራልያይት ሶማል፡ ሕር ናይ ከርስ ሰልጠት ክምሰል ለህሌ እለ አወጀ።

መንጠቀት ጃልክዕዮ

“መንጠቀት ጃልክዕዮ” ለትብል ስሜት፡ ምን ዲብ ግብለት ምድር ፑንት ዲብ መንጠቀት ሞድቅ ለህሌት መዲነት ጃልክዕዮ ለትበገሳ ቱ። ምስል አቶብዩ ለትትሓደድ መንጠቀት ጃልክዕዮ እብ በዳሪት ገሌ ስያስዪን ዳርሳም ሜርሐት ቀባይል፡ ዲብ ኦክቶበር 2002 ናይ መንጠቀት ሕኩመት አሰሰት። ምናተ ዲብለ ወክድ ለህይ እብ ሰዳይት ሰብ ሰልጠት አቶብዩ መትፈርታክ ቀባይል ወዐሻይር ክምሰልሁመ ሐርብ ኖስኖስ ሰበት ዐሊ፡ ለሕኩመት እብ ክእነ ለሐወጸት እተ ኢነት እብ ሸፋግ በዴት። “ሶማል ምን ክለን ድወል አፍሪቀ ወለዐል ናይ ህግዮ፡ ዲን፡ ዘርእ ወአስል ውሕደት ዲብ በ፡ እግልሚተ ዲብ መትፈራታክ ሐርብ ኖስኖስ ትሸመመት?” ለልብል መትስእላይ ኢልትሐገል። ዲብ ምሮ መጅተመዕ ላብድ መሻክል እግል ልግበእ ኢቀድር። ለሰአል፡ ናይ ክሉ ሕቁቅ ለለሐሽም፡ መሳልሕ ለለዐቅብ፡ ዲብ ክሉ መአሰሳት ሕኩመት እብ ዐድል ለለአሻርክ ስያስያይ ንዛም እብ ከአፎ ልትአከድ ለልብል ቱ። ምሮ መሕበራይ እንክር እግል ብዕዳም እንዴ አገውነ አርዛቅ ወሰልጠት ደውለት እበይኑ ልብሕቱ ዲብ ህለ፡ ለምሽክለት ተአነብት። ዲብ እዲነ፡ አፍሪቀ ወመንጠቀት ቀር አፍሪቀ ህዬ ለለህድግ ሳብት ደሊል አምሳል ህለ። ሰበት እሊ ዛህረት ሶማልመ ዲብ ከርስ እሊ ዓም እድንያይ መሻክል ለለአቴ ዲኢኮን ፍንቲት ለበ ኢኮን።

ሰለስ ሕኩማት

ዐለዮ ወመሓክም እስላሚያ ሐቆ ወዲቅ ንዛም ርኢስ መሐመድ ስያድ ባሬ ዲብ ሶማል እብ ግዲደ ሐርብ ኖስኖስ ሐቆለ ትወለዐ፡ ዲብ ሰነት 1991 አስክ 1999 ብዙሕ ናይ ዕሪት መሓክም እጅትመዓት - ዲብ መቃዲሾ፡ አስመረ፡ ጅቡቲ፡ አዲስ አበባ፡ ናይሮቢ ሰንዐ ወአልቃህረ ገብአ። ምናተ፡ እብለትፈናተ አስባብ በህለት ሰሩ ሶማልዲን ጀሃት እበ ከሉቁ መሻክል፡ ሰሩ ህዬ ናይ ካርጅ መዜርነት እበ ልፍዑሉ ከይናት ዲብ ናይ አማን ፍገሪት እግል ልብጸሕ ኢቀድረ። አቶብያመ ፍንጌል ሕድ ለልጸበአ ሐው ሶማልዲን ኢፋሉታይ ዶር ተልሂት። ግራሁ ህዬ ዲብ ሰነት 2000 ወጠንያይ ሙእተመር ዕሪት ዲብ ጅቡቲ ገብአ። ሐቆሁመ ብዙሕ ሙእተመራት አተላለ። ዲብ ደንጎበ ህዬ ዲብ ዮም 23 ፌብሩዋሪ 2012 ዲብ ለንደን ገብአ። እብ ክእነ ህዬ ሶማል፡ ናይ እሎም ለተሉ ዲብ ዓርተ ጅቡቲ፡ ዲብ ዶሬት ኬንያ፡ ዲብ ዓሲመት ጅቡቲ ዲብለ ገብአ ሙእተመራት ናይለ ተአሰሰዩ ሰለስ ሕኩማት መርሐለት ገብአት።

1. ሕኩመት ዐብደልቃድር ሰላድ ሐሰነ (2000-2004)

ዲብለ ዲብ ዮም 2 ማዮ 2000 ዲብ ዓሲመት ጅቡቲ ለገብአ፡ ምን ክሎም መሕበራይ ጀሃት ወለልትበአሶ ቀባይል ወዐሻይር ሶማል ለትፋገረው 4000 ሶማልዲን ለሻርኮ እቱ ምእተመር፡ ሐቆ ናይ አርበዕ ወሬሕ ኢመፋህመት ወመክሐደ፡ እብ ማርሒት ዐብደልቃድር ሰላድ ሐሰነ ለትትመረሕ መትዐደይት ሕኩመት ሶማል ተሐሬት። ለሙእተመር፡ ሕዳት ቀባይል ዲብ ወግም እንዴ አተ፡ እግለ አርበዕ መሕበራይ ሐሽምት ለወክል ፓርላማን ሐረ። እሊ ሙእተመር እሊ ሐቆህ ንዛም ጀነራል መሐመድ ስያድ ባሬ ዲብ ሰልፍ ሰነት 1991 ለወድቀ እቱ ወክድ፡ ናይ ሰልፍቱ ለዐለ። ናይ መንጠቀት ቃረት ወእዲነ ሸክል እግል አጽበጦቱ ህዬ ሩአሰ ሶማል፡ ጅቡቲ፡ ኤረትርዮ፡ ሱዳን፡ ዮመን ርኢስ ወዘረእ አቶብዩ መነዘመት ኢጋድ፡ መነዘመት ውሕደት አፍሪቀ፡ አልጃምዐ አልዐረብዩ፡ ሙእተመር እስላም፡ እተሓድ አርብ ወመነዘመት ምጅልስ ቅራን ዲብለ ዓደትለ እሕትፋል ሹሩካም ዐለው።

እሊ ሶማልያይ መጋይስ ላኪን እግለ ድዒፈት ወለትፈራተከት ሶማል ለሐዜ ለዐለ ሕኩመት አቶብዩ ሸቀላት ከልቀ እቱ። ሰበት እሊ እግለ ዲብ ዮም 24 ኣፕሪል 1992 ለፈግረ አስክ ሶማል ሰለሕ ነድእ ለመኔዕ ቀራራት ምጅልስ አምን ዕልብ 751 እንዴ ኬደ፡ እግል መናቢት ሐርብ ሶማል እብ ሰላዲ ወስለሕ ሰደ። እግል መትዐዳይት ሕኩመት ሶማል ለትጸበእ በዳሪት እንዴ ነስአ ህዬ፡ ዲብ ሰልፍ ማርስ 2001 ዲብ አቶብዩ መዲነት አውሰ “ምጅልስ ዕሪት ሐደሶት ሶማል” ለትሰመ ስያሰያይ ወዐስከርያይት ቅወት አሰሰ። ሕኩመት አቶብዩ እብ ማርሒት መለስ

ዜናዊ፡ ዲብ ሶማል ለትፈናተ እግል ኖስኖሶም ለልጸበኦ ሕኩማት ዲብ ከወኖት በዳሪት ነስኦት። ቅዋተ ህዬ እብ ፍንቱይ ሐቆ 11 ስበተምበር 2001 “እርሃብ እግል ጋብሆት” እበ ትብል ምስምስ ዲብ ምውዳቅ ሶማል፡ ዲብ መዳይን ወደገጊት መትኦታይ ወዱ ዐለው። እሊ ህዬ እብ ሰዳይት ወመባረከት እዳሪት አሜሪካቱ ገብእ ለዐለ። እግል እለ ቀድኖት እለ ዲብ ተሌ ኦርእስ እብ ተፋሲል እግል ንወደሓቱ።

ርኢስ ዐብደልቃስም ሰላድ ሐሰን ዲብ ዮም 25 ኦክቶበር 2002 እግል ስያሰት አቶብዩ እንዴ አሸረ ዲብለ ሀበዩ ሸሬሕ፡ አቶብዩ ሶማል እግል ፈንጠሮት ትሸቄ ክምሰል ህሌት፡ ለዲብ ሶማል ለገብእ ሐርብ ኖስኖስ ናይ ስለሕ መቃወማት እግል ለአክትም ክምሰል ኢተሐዜ ወደሐ። እብ ተውሳክ ርኢስ ዐብደልቃስም ሰላድ ሐሰን ዲብ ዮም 23 ጁላይ 2003 ዲብ ሀበዩ ሸሬሕ፡ አቶብዩ ኖስኖስን ሕድ ለለአፈንዩ ምድር ሶማል፡ ምድር ፑንት፡ ምድር በናድር ወምድር ጁብ ለትሰመዩ ዲብ ቀባይል ለተአሰሰዩ ሕኩማት ክምሰል ተሐዜ ወሶማል እንዴ ትፈራተከት እግል ትርኣዩ ዐሸም ክምሰል በ አፍሀመ። “ሕኩመት አቶብዩ ምስል ቀባይል ሶማል ሌጣቱ እግል ልሸቄ ንዩት ለቡቱ” እበ ልብል ህዬ ወደሐዩ። እት ረኣስ እሊ ህዬ ርኢስ ሶማል ዐብደልቃስም ሰላን ሐሰን ዲብ ጁላይ 2003 ዲብ ሙዛምቢክ መዲነት ሞቡቱ ዲብለ ገብእ ሙእተመር ሜርሐት አፍሪቀ ዲብለ ቀደመዩ ከሊመት፡ ሕኩመት አቶብዩ ዲብለ ሐልፊዩ ሰለስ ሰነት ዲብ ቅደይ ከርስ ሶማል መትኦታይ ትወዴ ክምሰል ዐለት እግል ቀራር መኔዕ ስለሕ አስክ ሶማል እንዴ ኬደት ህዬ እግል መናቢት ሐርብ ክምሰል ሰሌሕ ፈደሐ። አቶብዩ እግል መናቢት ሐርብ እብ ስለሕ ወሰላዲ ዲብ ስድኖት እበይነ እግል ትትሐረክ ኢትቀድር። ምናተ እተ ወክድ ለሀይመ ክምሰለ ቀደሙ ገብእ ለዐለ ሰዳይት ወመባረከት እዳሪት አሜሪካ ረክብ ዐለት። ዲብ ደንጎብ ህዬ ንዩተ አፍሸሎት ቀራራት ዓርተ ክምቱ አከደ። እግል ሕኩመት ዐብደልቃስም ሰላድ ሐሰን እንዴ ሐንቀት ህዬ ዲብ ሶማል እብ ግዲደ መትፈራታክ እግል ሊዚድ ናዩ ቴልኖት ላተን ሕኩማት፡ ዲብ ዶሬት፡ ባይደወ ወመቃዲሾ ከወነት።